



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

KONFERENSIA IMPRENSA

Dili, 01 Feveiru 2007

**TRIBUNAL HUSU EX-VISE MINISTRU INTERIOR NINIA DEPOIMENTUS
RELASIONA HO KAZU KRIMINAL FAHE KILAT
BA POPULASAUN SIVIL**

Tribunal Distrital Dili, liu husi Juiz Kolektivu, iha loron Kuarta-Feira, 31 Janeiru 2007, halao julgamentu iha Tribunal Rekursu Timor Leste hodi rona depoimentus husi Ex-Vise Ministru Interior ne'ebe oras ne'e dadaun kaer kargu hanesan Ministru Interior relasiona ho kazu kriminal fahe kilat ba populasaun sivil. Julgamentu rona depoimentus sasin nian ne'e hahú tuku 09:40 otl no remata iha tuku 10:50 otl. Julgamentu ne'ebe halao mais ou menus durante oras 1(ida) nia laran ne'e fó prioridade atu rona depoimentus husi testemuña ALSINO BARRIS.

Wainhira Tribunal husu konaba harii ou estebelesimentu Grupu Seguransa Sekreta ne'e no aksaun kriminal distribuusaun armas ba populasaun sivil sira iha Timor Leste ne'e tuir akuzasaun katak arguidu Rogerio Tiago Lobato maka halao, Sasin Alsino Barris hata'an katak nia la hatene ou nia laiha koñesimentu konaba ne'e. Alsino Barris deklarara katak nia foin hetan informasaun konaba kazu ne'e hafoin de situasaun krize iha Timor Leste.

Tribunal husu mós ninia depoimentus konaba sé maka sei responsabiliza ba agentes PNTL na'in 9 (sia) ne'ebe mate tanba hetan tiru iha loron 25 Maiu 2006 iha Ministériu Justisa nia oin ne'e, Sasin Alsino Barris hata'an katak ONU maka bele responsabiliza konaba insidente ne'e. Tanba iha momentu ne'eba Polísia ONU (UNPol) maka akompañã sira iha Quarter Geral PNTL no Polísia ONU (UNPol) maka dirije Agentes PNTL sira sai husi Quartel Geral atu ba Obrigado Barraç hafoin to'o iha Ministériu Justisa nia oin maka Agentes PNTL na'in 8 (walu) ne'e hetan tiru to'o mate. Agente ida seluk fali, tuir Inspektor Afonso de Jesus , ne'ebe hato'o tiha ona ninia depoimentus ba Tribunal iha loron 15 Janeiru 2007 liu ba katak agente PNTL ne'e hetan tiru to'o mate kedan iha kareta ne'ebe nia konduz ou nia lori ne'e nia laran iha momentu ne'eba.

Tribunal husu mós katak Ministériu Interior ne'e iha kompetensia atu harii Grupu Sivil Armadas hodi fó apoiu ba Polísia PNTL? Sasin Barris hata'an ba kestaun ne'e ho ninia interpretasaun rasik ba artigu 8 husi Lei No.8/2003 konaba seguransa interna nian katak Ministériu Interior iha kompetensia ba assuntu ne'e. wainhira JSMP halo verifikasaun ba Lei ne'ebe sasin temi, bele hatene katak iha

artigu ne'e dehan deit katak konaba assuntu ida ne'e kompetensia Governu nian. Laos kompetensia Ministériu Interior nian. JSMP hatene mós katak kuandu Juiz Prezidente halo fali konfirmasaun konaba depoimentus ne'e, katak "ida ne'e hanesan interpretasaun propriu testemuña nian?" Sasin Barris konfesa katak ida ne'e tuir ninia interpretasaun rasik deit.

Alén ida ne'e, Sasin Alsino Barris deklara sai mós ba Tribunal katak iha keisa barak maka nia simu husi Populasaun no autoridades lokais sira iha Liquiça katak Membru husi Grupu Railos nian dala barak halo aksaun terror no halo intimidasaun ba populasaun sira balun iha Liquiça.

JSMP apresia tebes intensaun diak husi sasin sira hodi mai iha tribunal atu tuir Julgamentu. JSMP no ita hotu espera katak depoimentus hotu ne'ebe sasin sira hato'o ona ba tribunal ne'e bele sai hanesan matéria konsiderasaun ba Tribunal atu bele utiliza didiak hodi bele hetan verdade material antes hola sira ninia desizaun. Ita hotu hein katak tribunal sei hola desizaun ida ne'ebe justu no lós i desizaun ne'ebe partes hotu bele simu.

Ho bazeia ba deklarasoins testemuñas sira nian ne'ebe hato'o iha julgamentu judisial nian ba tribunal ne'e, inklui depoimentus husi sasin Alsino Barris nian, JSMP hato'o rekomendasaun ba parte ne'ebe maka sente katak ninia-an hetan tratamentu ne'ebe la justu, etc., atu bele hato'o keisa sira ne'e ba entidades sira ne'ebe kompetentes. Ba assuntu ida ne'e, ema ne'ebe deit bele hakbesik-an ba Polísia ne'ebe besik liu ou ba direktamente iha Ministériu Públiku (Prokuradoria) hodi hato'o keisas hirak ne'e ba entidades sira ne'e atu bele prosesa tuir Lei ne'ebe oras ne'e aplika iha Timor Leste. Wainhira ita hato'o deit informasaun hirak ne'e ba ema seluk maibe ita la hato'o ba entidades ne'ebe kompetente ne'e, konserteza ita nia lamentasaun ou informasaun hirak ne'e sei sai ba informasaun deit tanba sei laiha ninia kontinuasaun ba kazu ne'e.

ATU HETAN LIU TAN INFORMASAUN KONABA NE'E BELE KONTAKTU HO:

Maria Vasconcelos

Acting Director, JSMP

Telephone: 332 3883

Email: vasconcelosmerry@yahoo.com